

Na osnovu člana 23. i 55. Statuta općine Ilijaš ("Službene novine Kantona Sarajevo", broj:20/09-prečišćeni tekst i 46/18), člana 99. Poslovnika Općinskog vijeća Ilijaš ("Službene novine Kantona Sarajevo", broj:2/10, 18/15 i 7/19) i člana 3. Odluke o stipendiranju učenika i studenata u stanju socijalne potrebe ("Službene novine Kantona Sarajevo", broj:33/09), Općinsko vijeće Ilijaš, na svojoj 9.sjednici održanoj 28. septembra 2021.godine, donijelo je:

Pravilnik o izmjenama i dopunama Pravilnika o stipendiranju učenika i studenata u stanju socijalne potrebe-prečišćeni tekst

Član 1.

U Pravilniku o stipendiranju učenika i studenata u stanju socijalne potrebe-prečišćeni tekst, ("Službene novine Kantona Sarajevo", broj:2/16), u daljem tekstu: Pravilnik, u članu 1. alineja 6 iza riječi: "do 06.aprila 1992.godine", dodaju se riječi: "pod uslovom da im je utvrđen status povratnika,".

Član 2.

Član 2., se mijenja i glasi:

"Pod učenicima i studentima u stanju socijalne potrebe, u smislu ovog Pravilnika podrazumijevaju se:

- lica koja nemaju izvor prihoda, odnosno da primanja po članu porodice ne premašuju nivo materijalnog cenzusa utvrđenog za socijalna davanja u Kantonu Sarajevo za tekuću godinu.

Materijalni cenzus za socijalna davanja izračunava se u skladu sa Zakonom o socijalnoj zaštiti, zaštiti civilnih žrtava rata i zaštiti porodica sa djecom, kao proizvod prosječne neto plaće ostvarene u Kantonu Sarajevo u prethodnoj kalendarskoj godini, pomnožene sa odgovarajućim koeficijentom definisanim na osnovu Odluke o visini koeficijenta za obručun neto plate ostvarene u Kantonu Sarajevo, koju donosi Vlada Kantona Sarajevo i Instrukcije o inosima novčanih davanja po Zakonu o socijalnoj zaštiti, zaštiti civilnih žrtava rata i zaštiti porodica sa djecom, na prijedlog Ministarstva za rad, socijalnu politiku, raseljena lica i izbjeglice Kantona Sarajevo.

Porodicu iz prethodnog stava ovog člana čine: roditelji, braća, sestre, bračni drug, djeca rođena u braku ili van braka, usvojena djeca, ako žive u zajedničkom domaćinstvu."

Član 3.

Član 4. mijenja se i glasi:

"O stipendiranju učenika i studenata iz člana 1. ovog Pravilnika staraju se Služba za društvene djelatnosti i poslove mjesnih zajednica i Služba za privredu i finansije Općine Ilijaš.

Služba za društvene djelatnosti i poslove mjesnih zajednica će:

- zaprimati prijave na Konkurs;
- obezbijediti potrebne uslove za rad Komisije za provođenje Konkursa;
- po završetku Konkursa i izboru kandidata po odluci Općinskog načelnika, nastaviti sve dalje aktivnosti vezane za sprovođenje Odluke o izboru;
- pratiti realizaciju zaključenih pojedinačnih Ugovora o stipendiranju.

Služba za privredu i finansije će:

- vršiti doznaku sredstava stipendistima putem ovlaštene poslovne banke."

Član 4.

U članu 7. mijenja se stav 3. koji glasi:

"U sastav Komisije imenuju se: 3 predstavnika Općinskog vijeća Ilijaš, 1 predstavnik Službe za društvene djelatnosti i poslove mjesnih zajednica Općine Ilijaš i 1 predstavnik Službe za opću upravu, boračko-invalidsku i socijalnu zaštitu Općine Ilijaš. Na prvoj sjednici Komisije članovi Komisije će izabrati predsjednika Komisije."

Mijenja se stav 5., koji glasi: "Svaki učesnik u konkursu mora biti pismeno obavješten o rezultatima izbora, najkasnije u roku od 15 dana od dana izbora, a nezadovoljni učesnik u konkursu može podnijeti prigovor za zaštitu svojih prava Općinskom načelniku u roku od 8 dana od prijema obavjesti."

Mijenja se stav 6., koji glasi: "Odluka o izboru kandidata za stipendiranje objavljuje se na oglasnoj ploči općine Ilijaš."

Briše se stav 7.

Član 5.

U članu 8., stav 1., alineja 3 se mijenja i glasi:

"– sačinjavanje prijedloga Odluke o izboru kandidata za stipendiranje i dostavljenje Općinskom načelniku, koji donosi konačnu Odluku o izboru;"

Član 6.

Član 9. mijenja se i glasi:

"Pravo učešća na Konkursu imaju učenici i studenti: I, II, III i IV godine prvog ciklusa, I i II godine drugog ciklusa, I, II, III, IV, V i VI godine integrisanog studija, u stanju socijalne potrebe, koji nisu obnavljali godinu, a koji su u predhodnoj školskoj/akademskoj godini imali uspjeh u školi odnosno fakultetu i to:

- učenici srednjih škola sa najmanjom prosječnom ocjenom 3,50;
- redovni studenti visokoškolskih ustanova sa prosjekom ocjena od najmanje 7,0 za fakultete iz grupacije društvenih nauka (Ekonomski fakultet; Fakultet za kriminalistiku, kriminologiju i sigurnosne studije; Fakultet političkih nauka; Pravni fakultet; Fakultet za javnu upravu), grupacije humanističkih nauka (Fakultet sporta i tjelesnog odgoja; Filozofski fakultet; Pedagoški fakultet; Fakultet islamskih nauka; Katolički bogoslovni fakultet), grupacije umjetnosti (Akademija likovnih umjetnosti; Akademija scenskih umjetnosti; Muzička akademija). Prosjek ocjena od najmanje 6,50 za studente fakulteta iz grupacije medicinskih nauka (Fakultet zdravstvenih nauka; Farmaceutski fakultet; Medicinski fakultet; Stomatološki fakultet; Veterinarski fakultet), grupacije tehničkih nauka (Arhitektonski fakultet; Elektrotehnički fakultet; Fakultet za saobraćaj i komunikacije; Građevinski fakultet; Mašinski fakultet; Rudarsko-geološki fakultet; Fakultet informacijskih tehnologija), grupacije biotehničkih nauka (Poljoprivredno-prehrambeni fakultet; Šumarski fakultet) i grupacije prirodno-matematičkih nauka (Prirodno-matematički fakultet-odsjeci za matematiku, fiziku, biologiju, hemiju, geografiju).

Pravo učešća na konkursu za stipendiranje imaju redovni studenti koji nisu obnavljali godinu, a pohađaju studijske programe na visokoškolskoj ustanovi kao javnoj ustanovi, iz grupacije medicinskih nauka (Farmaceutski fakultet; Medicinski fakultet; Stomatološki fakultet; Veterinarski fakultet), grupacije tehničkih nauka (Arhitektonski fakultet; Elektrotehnički fakultet; Fakultet za saobraćaj i komunikacije; Građevinski fakultet; Mašinski fakultet; Rudarsko-geološki fakultet; Fakultet informacijskih tehnologija) i grupacije biotehničkih nauka (Poljoprivredno-prehrambeni fakultet; Šumarski fakultet), bez

obzira na ostvareni prosjek ocjena iz prethodne akademske godine.

Pravo učešća na Konkursu imaju učenici i studenti koji su ostvarili manji prosjek ocjena od traženog, a čije će se molbe razmatrati ukoliko ispunjavaju druge kriterije utvrđene ovim Pravilnikom i ukoliko ne bude prijavljen dovoljan broj kandidata koji ispunjavaju uslove iz predhodnog stava ovog člana.

Pravo učešća na Konkursu za stipendiranje ima jedan učenik ili student koji potiče iz porodice u kojoj se istovremeno školuje troje i više djece, bez obzira na ostvareni prosjek ocjena iz prethodne školske/akademske godine.

Pravo učešća na Konkursu za stipendiranje nemaju učenici i studenti koji obnavljaju godinu (upis na tekuću godinu drugi ili treći put) i apsolventi."

Član 7.

Član 13. se mijenja i glasi:

"Ako bilo koji od kandidata dobije stipendiju od nekog drugog Fonda, organizacije, udruženja ili institucije, isti se eliminiše sa bodovne liste, odnosno slijedeći kandidat sa bodovne liste dobiva općinsku stipendiju."

Član 8.

Član 15. mijenja se i glasi:

"Stipendije su nepovratne ukoliko stipendisti redovno ispunjavaju svoje školske obaveze.

Roditelj (staratelj) učenika i student, koji je potpisnik Ugovora o stipendiranju, dužan je vratiti sav iznos sredstava koje je primio za stipendiranje po osnovu ovog Pravilnika uz pripadajuću zakonsku kamatu, u roku od godinu dana, u slučaju ako učenik ili student napusti redovno školovanje ili ako izgubi pravo na dalje školovanje iz neopravdanih razloga.

Načelnik općine Ilijaš će putem Službe za društvene djelatnosti i poslove mjesnih zajednica i Službe za privredu i finansije, obezbijediti kontrolu sprovođenja odredbi Ugovora i po potrebi pokretati postupke za raskid Ugovora i nadoknadu sredstava."

Član 9.

U članu 17., stav 1., tačka 1. alineja 1, riječ: "osmom", zamjenjuje se riječi "završnom".

Stav 3., mijenja se i glasi:

"Na osnovu dodjeljenog broja bodova za svakog pojedinačnog kandidata, Komisija će utvrditi rang listu i sačiniti prijedlog Odluke o izboru kandidata za stipendiranje i dostaviti je Općinskom načelniku, koji će donijeti konačnu Odluku o izboru, po kojoj će se dodjeliti odobreni planirani broj stipendija."

Član 10.

Član 19. i 20. se briše.

Član 11.

Iza člana 18. dodaje se novi član 19. koji glasi:

"Gramatička terminologija korištenja muškog ili ženskog roda u ovom Pravilniku podrazumijeva uključivanje oba roda."

Član 12.

Iza člana 19. dodaje se novi član 20. koji glasi:

"Pravilnik o stipendiranju učenika i studenata u stanju socijalne potrebe-prečišćeni tekst, ("Službene novine Kantona Sarajevo", broj:2/16) u ostalom dijelu ostaje neizmjenjen."

Član 13.

Iza člana 20. dodaje se novi član 21. koji glasi:

"Pravilnik o izmjenama i dopunama Pravilnika o stipendiranju učenika i studenata u stanju socijalne potrebe-prečišćeni tekst" stupa na snagu danom objavljivanja u "Službenim novinama Kantona Sarajevo"."

Broj: 01/1-02-2040-12/21
Ilijaš, 28.09.2021. godine



PREDSJEDAVAJUĆA
OPĆINSKOG VIJEĆA ILIJAŠ

ALMA OMERović